

DOMENIE XIV «VIE PAL AN»

Jutoris pe Liturgjie

Domenie, ai 08 di Lui dal 2018

Scoltant lis leturis di vuê sul profete che Diu al mande al popul, al semee che a esistin dôs religjons: la religjon che Diu i ten e la religjon, al contrari, che la comunitât e preferis. Si lei in Isaie: Al dîs il Signôr I miei pinsirs no son i vuestris pinsîrs (Is. 55, 8); si podarès ancje dî: sentence dal Signôr, la me religjon no je la vuestre religjon.

Il profete, che al à in cûr la peraule di Diu e i segnâi dai tîmps gnûfs si cjate in dificultât: Diu e i tîmps a domandin un cambiament radicâl di mentalitât, une liberazion dal vecjo par jentrâ tal gnûf; un vin gnûf in bufulis gnovis (Mt 9, 18): conversion che noaltris no vin nissune passion di metisi a fâ.

In plui la int e desiderere profetis come i personagjos o i champions de television, robe di teatri, prins tal scandai, intant che purtrop Ezechiel al è un puar esiliât (Ez 1, 1), Pauli al fâs tendis (At 18, 3) e Gjesù al è un fari (Mc 6, 3): personis de vite ordenarie di ogni dî, int che no conte te opinion che e conte.

Di solit, cul profete di turni, lis relazions te comunitât a cjapin une brute plee e plui di une volte l'om / femine di Diu a varan dome di scombati, tribulâ e cjapâlis di sante reson. Propit come che nus contin lis leturis.

A pensâle ben, dut chest al pues diventâ la situazion che si forme o si formarà tai nestrîs paîs ormai di fat cence predi e in plene dificultât.

O vin di scoltâ lis lezion de messe di vuê in cheste prospietive. Nus fasaran rifleti e nus saran di zovament. Soredut nus judaran a cjatâ pes nestrîs comunitâts, prime de organizazion, personis no di devozions ma di riflession sul vanzeli, no che a san za ma che a àn di imparâ, oms e feminis che i tegin ai tribulâts, personis umilis e concretis tal dâ une man.

A son i profetis che Diu nus mande par formâ lis gnovis comunitâts-glesie di paîs.

Antifone di jentrade

Sal 47,10-11

O stin pensant, Diu, al to boncûr
dentri dal to templi.

Come il to non, ancje la tô laut, Diu,
e rive sun dute la tiere;
incolme di justizie e je la tô gjestre.

Colete

Diu, che inte umiltât di to Fi
tu âs tornât a tirâ sù il mont ch'al jere colât,
da ai tiei fedêi une sante contentece
par ch'a puedin gjoldi pe eternitât
chei che tu âs sfrancjâts de sclavitût dal pecjât.
Pal nestrî Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Ez 2,2-5

A son une cjase cjaviestre, però a varan di ricognossi ch'al è stât un profete framieç di lôr.

Te tragedie dal popul di Israel - distruzion di Gjerusalem e depuartazion in Babilonie (secul VI) - il Signôr al cirî un om che al fasès di guide spirtuâl al so popul e al cjatà Ezechiel. Al è di tignî aments che no ducj a disin di "sì" al Signôr.

Ezechiel, un om d'ur e resistant come l'acâl, al veve cualchi probleme psichic, om un pôc salvadi, che si sierave in se stes, quartât a la depression. Ma noaltris no podìn metisi a discuti su lis sieltis di Diu: lui al sielç cui che al à voe e al sa lui il parcè.

Il pinsîr al torne ai nestrîs paîs: o vin di cirî di dissèrni lis personis dal Signôr e savêlis acetâ cui lôr limits e difiets, ancje se no simpri nus plasìn.

Dal libri dal profete Ezechiel

In chei dîs, al vignì dentri di me un spirt che mi fasè jevâ in pîts e scoltâ chel che mi fevelave. Mi disè: «Fi dal om, jo ti mandi te cjase di Israel, di une int cjaviestre che si è rivoltade cuintri di me; lôr e i lôr vons si son rivoltâts cuintri di me fint in di di vuê. A son fis cu la muse insolent e cul cûr d'ur chei che jo ti mandi di lôr. Tu ur disarâs: Il Signôr, gno Diu, al dîs cussì: Joi, s'a scoltassin ele finissin! Ma a son une cjase cjaviestre. Però a varan di ricognossi ch'al è stât un profete framieç di lôr».

Peraule di Diu.

SALM RESPONSORIÂL

dal Salm 122

Int cjaviestre, e forzit lu sin ancje nô che ormai saceâts di dutis lis stradis talpinadis o tornìn a cjapâ in man la nestre vite e...

R. I nestrîs vôi a cjalin de bande dal Signôr.

Se cjantât: Il cjant dai salms responsoriâi, p. 151.

O alci i vôi de tô bande,
a ti che tu sês a stâ tai cfi.
Ve: come i vôi dai fameis
de bande dai lôr parons a cjalin. **R.**

Come i vôi di une sierve
de bande de sô parone,
cussì i nestrîs vôi
a cjalin de bande dal Signôr, nestri Diu,
fin che nol varà dûl di nô. **R.**

Ve dûl di nô, ve dûl di nô, Signôr!
Parcè che o sin passûts di vergogne.
Masse saceade e je la nestre anime
dal sghignî dai massepassûts,
des ridadis di chei che nus remenin. **R.**

SECONDE LETURE

2 Cor 12,7-10

Mi vantarei vultîr des mê debolecis, par ch'e dismanti sore di me la potence di Crist.

I studiôs modernis a son avonde dacuardi tal dî che la spine inte cjar di Pauli e je la persecuzion continue de bande dal so popul a cause dal vanzeli. Diu nol fâs miracui par cambiâ lis vicendis dal Apuestul, ma i da la fuarce par superâ lis dificolts. Par ogni profete o persone di Diu a valin duncje lis peraulis: Tu âs vonde de mê gracie; la mê fuarce si palese te debolece.

De seconde letare di san Pauli apuestul ai Corints

Fradis, par no ch'ò montâs in supierbie pe grandece des rivelazions, mi è stade metude une spine inte cjar, un mes di satane che mi patafi par no ch'ò monti in supierbie. Trê voltis o ai preât il Signôr di slontanâlu di me. Mi à rispuidût: «Tu âs vonde de mê gracie; la mê fuarce si palese te debolece». Mi vantarei duncje vultîr des mê debolecis, par ch'e dismanti sore di me la potence di

Crist. Cussì mi vanti des infermitâts, des ofesis, des dibisugnis, des persecuzions, des miseriis parvie di Crist; parcè che cuant che o soi debul, al è propit in chel moment ch'ò soi fuart. Peraule di Diu.

CJANT AL VANZELI

Zn 1,14,12

R. Aleluia, aleluia.

Il Verbo si è fat cjar
e al è vignût a stâ framieç di nô.
A di chei che lu an acetât
ur à dât il podê di diventâ fis di Diu.

R. Aleluia.

VANZELI

Mc 6,1-6

Un profete al è spreseât dome te sô patrie.

Marc culî nus pinele lis cjacaris e lis maraveis in ben e in mâl de int di Nazaret tai riguarts di Gjesù. Gjesù al à dome un tuart o merit: chel di fâ rifleti la int midiant de peraule di Diu par che e cjapi in man la situazion. Un "sveâsi - liberâsi" che la plui part dai fedêi de sinagoghe no gradis.

Tai grancj cambiaments che o stin vivint, sucedarajal ancje tes nestris comunitâts ce che i è sucedût al profete Gjesù?

Dal vanzeli seont Marc

In chê volte, Gjesù al rivà te sô patrie, compagnât dai siei dissepui. Rivade la sabide, al tacà a insegnâ inte sinagoghe e tante int che lu scoltave a disevin maraveâts: «D'indulà lis tirial fûr dutis chestis robis? E ce sapience ese cheste che i je stade dade? E ce meracui fasino lis sôs mans? Po no esal il fari, il fi di Marie e il fradi di Jacum, di Josef, di Gjude e di Simon? E lis sôs sûrs no sono culî framieç di nô?». E si scandulizavin di lui. Gjesù però ur diseve: «Un profete al è spreseât dome te sô patrie, framieç dai siei parincj e a cjase sô». E nol podê fâ nissun meracul, dome vuarî un pôcs di malâts metintjur sore lis mans. E si dave di maravee pe lôr mancjance di fede.

Lui al leve pai bords dulintor e al insegnave.

Peraule dal Signôr.

Su lis ufiertis

Cheste ufierte consacrade al to non
che nus smondei, Signôr,
e nus puarti di zornade in zornade
viers de vite dal cîl.
Par Crist nestri Signôr.

Antifone a la comunion

Sal 33,9

Cerçait e o viodarês cetant bon ch'al è il Signôr:
furtunât l'om che li di lui si pare.

O ben:

Mt 11,28

Vignît di me, ducj vualtris ch'ò sês stracs e masse cjamâts,
e jo us fararai polsâ, al dîs il Signôr.

Daspò de comunion

Colmâts di tancj regâi, ti prein, Signôr,
di cjapâ ancje il regâl de salvece
e di no cessâ mai inte tô laude.

Par Crist nestri Signôr.

* * *

Riflession di pre Antoni Beline: Pocje furtune pai profetis

E je une pagjine dal vanzeli di une umanitât e di une atualitât estremis. Crist il marangon che nol pues fâ miracui tal paîs che al è cressût parcè che la int lu sbelee e si infote; Crist che si viôt inibide la sô potence de mancjance di fede dai paisans; Crist che al prove dut il marum che o provin ancje nô ogni volte che si sintin sbefâts e “snobâts” tal nestri ambient...

Vanseli par un popul, an B, p. 131.

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Par Diu

***al è miôr no crodi,
pluitost che sedi un cristian
dome par di fûr,
cence il spirt di Gjesù dentri.***

Pape Francesc

* * *

Martars 10: S. Piu I, pape;

Joibe 12: Sants Ermacure e Furtunât;

Vinars 13: Dedicazion de basiliche di Aquilee.

**DOMENIE 15 AS SÎS SORE SERE,
TE BASILICHE MARI DI AQUILEE,
MESSE DI AVÔT DAL FRIÛL
AI SANTS ERMACURE E FURTUNÂT.**

***Su, fati dongje, int di S. Ermacure,
al to pastôr e a Furtunât rivolziti,
ai testimonis, che tu sâs in glorie,
parcè che pe lôr fede a àn dât la vite.***

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal*

popul furlan, Ed. Glesie Furlane, 2012.

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*

* *Par domandâ chescj libris scrîvêt a info@glesiefurlane.org*

